

ԳԻՏԱԿԱՆ ԼՐԱՏՈՒ

ԳԻՏՈՒԹՅԱՆ ՊԱՏՄՈՒԹՅԱՆ ԱՆԴՐԿՈՎԿԱՍՅԱՆ ԱՌԱՋԻՆ ԿՈՆՖԵՐԱՆՍԸ

1965 թ. հոկտեմբերի 7—11-ը նրկանում տեղի ունեցավ գիտության պատմության անգրկով-կասյան առաջին կոնֆերանսը: Կոնֆերանսի նպատակն էր հանրագումարի բերել Անդրկովկա-սում գիտության պատմության գծով կատարված աշխատանքները, սերտ կապ ստեղծել այդ ուղ-ղությամբ աշխատող գիտնականների միջև, նախատեսել առաջիկա խնդիրները, կոորդինացնելով այդ աշխատանքները և դարձնելով ավելի ևս արդյունավետ ու նպատակասլաց:

Այս տեսակետից ներկա կոնֆերանսը Անդրկովկասում առաջին փորձն էր, և այն բավական մեծ հետաքրքրություն էր առաջացրել գիտության պատմության զբաղվող մասնագետների շրջանում: Կոնֆերանսին մասնակցում էին շուրջ 300 գիտնականներ՝ անդրկովկասյան հանրապե-տություններից ու Միության տարբեր քաղաքներից (Մոսկվա, Լենինգրադ, Կիև, Վիլնյուս, Յա-րոսլավլ):

Բացելով կոնֆերանսը, Հայկական ՍՍՌ գիտությունների ակադեմիայի պրեզիդենտ, ակա-դեմիկոս Վ. Հ. Համբարձումյանն ասաց. «Մեր ակադեմիան միշտ էլ մեծ նշանակություն է տվել գիտության պատմության հարցերին: Մենք համոզված ենք, որ կոնֆերանսը ավելի ևս կնպաստի իմացության այդ կարևոր ճյուղի զարգացմանն ու ընդլայնմանը»:

Պլենար նիստում ելույթ ունեցան գիտության պատմության Միջազգային ակադեմիայի պրեզիդենտ Ա. Պ. Չուլկևիչը և գիտության պատմության Միջազգային միության վիցե-պրե-զիդենտ Ա. Տ. Գրիգորյանը: Նրանք խոսելով միջազգային մասշտաբով այդ ուղղությամբ կա-տարվող աշխատանքների մասին, մասնավորապես կանգ առան գիտության պատմության բնա-զավառում Անդրկովկասում կատարվող մեծ աշխատանքների վրա, որի փայլուն ապացույցնե-րից մեկը վերջին տասնամյակում Հայաստանի, Վրաստանի ու Ադրբեջանի մի խումբ գիտնա-կանների հաջողությամբ ղեկուցումներով հանդես գալն է՝ միջազգային սիմպոզիումներում ու կոնֆերանսներում:

Ադրբեջանի գիտությունների ակադեմիայի վիցե-պրեզիդենտ Մ. Ա. Թոփչիբաշևը զեկուցեց «Գիտության զարգացումը Ադրբեջանում վերջին քսան տարում» թեմայով: Նա նշեց նաև անդր-կովկասյան հանրապետությունների գիտությունների ակադեմիաների համատեղ աշխատանքով բազմաթիվ ընդհանուր հետաքրքրություն ներկայացնող պրոբլեմների լուծման անհրաժեշտու-թյունը:

Հայկական ՍՍՌ գիտությունների ակադեմիայի վիցե-պրեզիդենտ Մ. Գ. Ներսիսյանը իր զե-կուցման մեջ շարադրեց այն նվաճումները, որոնք ձեռք են բերել Հայաստանի գիտնականները տարբեր գիտահետազոտական հիմնարկներում: Զեկուցողը միաժամանակ կանգ առավ այն մեծ խնդիրների վրա, որոնք դրվում են փիլիսոփաների, պատմաբանների ու լեզվաբանների առջև, ավելի ևս ընդարձակելու ուսումնասիրությունները՝ կապված հայկական գիտության ու կուլտու-րայի պատմության հետ, սկսած հայ ժողովրդի կաղամվորման ժամանակից մինչև մեր օրերը:

Այնուհետև՝ ելույթ ունեցան Գ. Բ. Պետրոսյանը, Վ. Գ. Պարկաձեն և Ի. Կ. Էֆենդիևը, որոնք համապատասխանորեն կանգ առան Հայաստանում, Վրաստանում ու Ադրբեջանում բնագիտու-թյան ու տեխնիկայի պատմության զարգացման հարցերի վրա: Այդ հարցերով տարբեր ժամա-նակներում զբաղվել են փոքրաթիվ գիտնականներ, իրարից կտրված ու մեկուսացված: Վեր-ջին ժամանակներս այդ աշխատանքները նոր թափ ստարան և կոորդինացվեցին հանրապետու-թյունների գիտությունների ակադեմիաներին կից կազմակերպված հատուկ խորհուրդներում: Որպես խրախուսելի միջոցառում նշվեց, որ Հայկական ՍՍՌ գիտությունների ակադեմիայի բնա-գիտության ու տեխնիկայի պատմության խորհուրդը լույս է ընծայում հատուկ պարբերական, որն իր շուրջն է համախմբել գիտնականների մի ստվար կոլեկտիվ:

Պլենար նիստում հետաքրքրությամբ լսվեց պրոֆ. Ա. Գ. Արրահայանի զեկուցումը՝ Մ. Մաշտոցի անվան հին ձեռագրերի ինստիտուտի՝ Մատենադարանի ձեռագիր գանձերի մասին։ Կարևորագույն պրոբլեմի էր նվիրված ՍՍՌՄ գիտությունների ակադեմիայի թղթակից-անդամ Բ. Մ. Կեզրովի զեկուցումը՝ «Էմպիրիկն ու տեսականը գիտության պատմության մշակման մեջ»։

Զեկուցումների շուրջը տեղի ունեցած քննարկմանը մասնակցեցին տարբեր գիտահետազոտական հիմնարկների ու ռուհերի գիտնականներ։

Կոնֆերանսում գործում էին գիտության ու տեխնիկայի պատմության մեթոդոլոգիայի, մաթեմատիկայի ու մեխանիկայի, ֆիզիկայի ու աստղագիտության, քիմիայի, կենսաբանության, երկրաբանության, աշխարհագրության, տեխնիկայի, բժշկության ու գյուղատնտեսական գիտությունների պատմության (թվով 10) սեկցիաները։

Ընդամենը լսվեց 104 զեկուցում, որից 8-ը՝ պլենար նիստում, իսկ 96-ը՝ սեկցիաներում։ Զեկուցումների մեծ մասն շուրջը տեղի ունեցան լայն ու մանրամասն քննարկումներ, մտքերի փոխանակումներ ու բանավեճեր։ Արժարժված հարցերի մի մասը վերաբերում էր բնագիտության ու տեխնիկայի պատմությանը՝ հին ու միջնադարյան շրջանում։ Դրանցից էին Մ. Ա. Կաշկայի ու Ի. Բ. Սելիմյանովի զեկուցումը՝ «Օգտակար հանածոների օգտագործումը Ադրբեջանում հին ժամանակներում», Կ. Ա. Մկրտչյանի ու Ս. Մ. Այվազյանի զեկուցումը՝ «Մեծամորի հնագույն լեռնամետալուրգիական կառույցը», Վ. Կ. Զալոյանի զեկուցումը՝ «Բնագիտության ու փիլիսոփայության փոխազդեցության հարցը հին Հայաստանում», Գ. Մ. Լուսինի զեկուցումը՝ «Առաջին մագնիսա-օդերևութաբանական կայանը Կովկասում», Ս. Տ. Նրեմյանի զեկուցումը՝ «Հայկական քարտեզագրության հնագույն հուշարձանը», Մ. Ա. Սուլթանովի զեկուցումը, որը վերաբերում էր Հին Արևելքի ձեռագրերում դեղատոմսերի ու նրանց անվանակոչության մասին եղած տեղեկություններին և շատ այլ զեկուցումներ։

55 զեկուցում վերաբերում էր գիտության տարբեր ճյուղերի զարգացմանը սովետական շրջանում։ Հետաքրքրությամբ լսվեց Լ. Վ. Միրզոյանի զեկուցումը՝ «Աստղասփյուռների ուսումնասիրության նշանակությունը կոսմոգոնիայում», ինչպես հայտնի է աստղասփյուռները առաջին անգամ հայտնաբերվել ու ուսումնասիրվել են Բյուրականի աստրոֆիզիկական դիտարանում։ Ֆ. Ա. Մելիքովը իր զեկուցման մեջ շարադրելով Ադրբեջանում անասնաբուծության զարգացման հիմնական էտապները, հատկապես ընդգծեց այդ գործում անդրկովկասյան մյուս հանրապետությունների փոխադարձ օգնության մեծ կարևորությունը։ Ա. Ի. Ամատունու և Գ. Մ. Ղարիբյանի զեկուցումը վերաբերում էր տեսական ֆիզիկայի զարգացմանը Հայաստանում, Մ. Ա. Զավադովի զեկուցումը՝ երկրաչափության զարգացմանը Ադրբեջանում և այլն։

Կոնֆերանսի աշխատանքները բավական աշխուժացրին ու հետաքրքրական դարձրին միութենական մյուս քաղաքներից ու հանրապետություններից ժամանած գիտնականների զեկուցումները։ Առանձնապես հետաքրքրական էին պրոֆ. Ա. Պ. Յուշկևիչի, Դ. Դ. Իվանենկոյի, Ս. Վ. Պետրովի, Բ. Գ. Կուզնեցովի, Բ. Ի. Սպասկու և այլոց ելույթները։

Պլենար նիստում հաշվետվություններ տրվեցին սեկցիաներում կատարված աշխատանքների մասին։

Կոնֆերանսը, ընդունած որոշման մեջ, անհրաժեշտ համարեց Ադրբեջանի, Հայաստանի ու Վրաստանի գիտության պատմության մասնագետների համար սխտեմատիկ հրավիրել համատեղ կոնֆերանսներ՝ նպատակ ունենալով իրականացնել ուսումնասիրությունների հաստատուն համագործակցությունը, աշխատանքների կոորդինացումը, արդյունքների ամփոփումը և մոտ ապագայի հեռանկարների մշակումը։

Անդրկովկասյան հանրապետությունների ակադեմիաներին կից բնագիտության ու տեխնիկայի պատմության խորհուրդներին հանձնարարեց նախապատրաստել և 1967 թ. լույս ընծայել գիտության պատմության գծով աշխատություններ՝ նվիրված Հոկտեմբերյան սոցիալիստական մեծ հեղափոխության 50-ամյակին։ Անհրաժեշտ համարեց ստեղծել գիտության պատմության գծով հատուկ օրգան, որը կմիավորի սովետական բնագիտության ու տեխնիկայի պատմությամբ զբաղվող բոլոր գիտնականներին, անդրկովկասյան հանրապետություններում գիտության պատմությանը վերաբերող մատենագիտական տվյալների պարբերական հավաքումը, մշակումն ու հրատարակումը։